

**EUSKARA NAFARROAN.** Guraso talde batek Jose Antonio Perez Prados errektorearekin elkarriketa eskatu du

# Errektorearen oposizioak kanporaketen arduradunaren dimisioa eskatu du

Ekimen Anitzak NUPeko errektoreari leporatu dio «unibertsitatean elkarbizitza gero eta hondatuagoa izatea»

Alberto Barandiaran | IRUÑEA

NUPeko azken hauteskundeetan irakasleen botoen %45 eskuratu zituen Ekimen Anitza taldeak dimisioak eskatu ditu unibertsitatean, herenegungo kanporaketak eta atxiloketak direla eta, eta Jose Antonio Perez Prados errektoreari leporatu dio «egun NUPen bizi den elkarbizitzaren hondatze gero eta nabariagoa».

Ekimen Anitza taldean iritzi eta korda askotako irakasle eta langile biltzen dira, eta ekimenarako bozketetan hauteskundeak egiteko sistema demokratikoagoa eskatzeko osatu zen,

1999an. NUPeko hauteskundeetan bozketak nominalak dira, hau da, pertsonak aukeratzen dira, baina, praktikan, horrek itxi egiten die sarbidea korrante ezberdineko lagunei.

Hala, aurreko hauteskundeetan, nahiz eta botoen %45 inguru lortu irakasleen artean, ekimenean ordezkari bakarra sartu ahal izan zuen Ekimen Anitza taldeak. Langileen artean, ordea, ordezkari guztiak eskuratu zituen zerrendak.

## Ordezkaritza txikia baina presentzia handia

Atzo publiko egindako salaketa agiriak, horregatik, garrantzi

berezia du, erakusten duelako NUPeko agente taldeetan ordezkariarik eduki ez baina irakaslego eta langilegoaren artean leku handia duen taldearen iritzia.

Jose Basilio Galvan irakasleak sinatutako idazkiak errektoreari leporatzen dio NUPen egun dagoen giro gaiztoa, eta salatzen du euskararekin «unibertsitatearen estatutueta aurreikusita dagoenaren kontran etengabeko eraso egiten ari direla, egungo legedira hautsiz horrela».

Gobernu taldeak «erreflexu demokratikoak» ez dituela eduki nabarmendu ondoren, Klaus-

tro Anitza taldeak kanporaketak agindu zituen arduradunaren dimisioa eskatzen du.

## «Inork ez zuen lanik hartu komisarira joateko»

«Unibertsitateko inork ez zuen lanik hartu komisarira joan eta atxilotutakoengatik galdetzeko; nahikoa zen, antza, deitzearekin», dio idazkiak.

Halaber, errektoretza taldeak erakutsi zuen «koordinazioa eta ardura falta» azpimarratu du Ekimen Anitza taldeak. Kritikatu du, era berean, errektoretza taldeak egindako oharra. Bertan esaten zen protesta «soziopolitiko» zela. «Ez al dira,

bada, soziopolitikoak hirugarren munduarekiko elkartasun ekimenak?», galdetzen dute. «Bada, horiek baimenduak izaten dira beti». «Zer esan nahi du errektorearen taldeak? Euskararen inguruan egiten ari den politika negargarria dela eta egiten diren protestak ez dakigu zer talderekin harremana dutela, berez?».

Errektoreak gai honi heldu beharko dio, ezinbestez, datoren astea, lanera itzultzen den —herenegun kanpoan zen—, guraso talde batek elkarriketa zuzena eskatu baitu, hain zuzen ere gai hau aurrez aurre jorratu ahal izateko.



MIKEL UHARTE

Klaustro Anitza ekimeneko ordezkariak, duela bi urteko hauteskundeetako ekitaldi batean.

## JUAN JOSE LIZARBE

PSNko idazkari nagusia

### «Gobernu ordezkaria trebea da oso lardaskeriak egiten»

PSNko idazkari nagusi Juan Jose Lizarbek Espainiako Gobernuak Nafarroan duen ordezkariaren lana kritikatu zuen atzo, eta «lardaskeriak egiten trebea» dela esan zuen. «Iribas jaunak ordenean jarri beharko luke Gobernu Ordezkaritza, eta azkarrago eta lasaiago aritu». Lizarberi «gaizki» iruditzen zaio Poliziak izandako jarrera, eta atxilotuak identifikatzeko tramitea «azkarrago, eta hainbeste zalapartarik sortu gabe» egin zitekeela nabarmendu zuen. Aznarren gobernuaren «politika autoritarioaren» ondorio izan zela esan zuen.

## KONTSEILUA

### «Nafarroan euskaraz bizi eta ikasteko azkenaldian jartzen ari diren oztopoak kritikatu nahi ditugu»

«Nafarroan, administrazio ezberdinen aldetik, euskaraz bizi eta ikasteko azkenaldian jartzen ari diren oztopoak kritikatu nahi ditu Kontseiluak». Kontseiluaren ustez, kasu honetan, «salagarria» da NUPeko arduradunek euskara desagertzearen alde egiten duten politika salatzeagatik, ekimen bat indarraren bidez desegitea. «Illo horretan, deia egiten diogu nafar gizarte osoari euskararen alde lan egiten jarraitu dezan eta euskararen normalkuntzaren kontra egiten diren ekimenak salatu ditzan».

## ERREAKZIOAK

### EAk eta Batzarrek Parlamentuan nahi dute errektorea

Eusko Alkartasunak eta Batzarrek NUPeko errektore Jose Antonio Perez Pradosen agerraldia eskatu dute Parlamentuan, azalpenak eman ditzan herenegungo kaleratze eta atxiloketen inguruan. Begonia Erraztik aurkeztutako idazkian salatzen du Poliziaren jarrera eta ekintza, eta nabarmendu du Francoren diktaduran ere errektoreek «ardura handiagoa» eskatzen zutela kanpusetan polizia sartzekotan zenean.

Euskal Herritarrok taldeak, bestalde, deklarazio politikoa aurkeztuko du bozemaileen mahaian, hain zuzen ere herenegungo gertakariak salatzeke. Talde abertzaleak argudiatu duenez, Nafarroa aitzindaria da «oinarritzko eskubideak urratzen», eta eskatu du Poliziaren ekintzari errefusa, eta errektorearen eta NUPeko kudeatzailearen dimisioa. Halaber, Euskal Adarra taldearen agerraldia eskatu du Hezkuntza eta Kultura Batzordearen aurrean, «euren jarrera eta proposamenen berri eman diezaioten batzordeari, eta atxiloketen ondotik sortu den egoera eza-gutzeko».